

## Allannguutissatut siunnersuut

uunga

**Uunga siunnersuut: Aalisarneq pillugu Inatsisartut inatsisaat**

Aappassaaneerneqarnissaanut Naalakkersuisunit saqqummiunneqarpoq:

## § 11-mut

1. § 11, imm. 2, peerneqarpoq.  
*Imm. 3-5 immikkoortunngussapput 2-4.*

## § 24-mut

2. § 24, imm. 2, imatut oqaasertalerneqassaaq:  
"Imm. 2. Kalaallit Nunaata Kitaanili raajarniarnermi aalisarnermik ingerlataqartup ataatsip pisami 30 %-iiniq tulaassisarnissaa atuuppoq."

## § 32-mut

3. § 32, imm. 1, nr. 3, ima oqaasertalerneqassaaq:  
" 3) Kalaallit Nunaata Kitaani sinerissap qanittuani qaleralinniarneq, tak. § 28, imm. 1, nr. 5: 2,500% "

## § 35-mut

4. § 35 ima oqaasertalerneqassaaq:  
" § 35. Pisassiissutinit pigisanik piginnittoq ukiumoortumik pisassiissutit 75%-iisa aalisarnissaannut pisussaaffeqarpoq, taamaattoq tak. § 39, imm. 4."

## § 38-mut

5. § 38, imm. 1 ima oqaasertalerneqassaaq:  
" Aalisarnermik ingerlatsisoq ukiumi pisassiissuteqarfiusumi ukiumut pisassiissutit 25 %-iiniq ukiup tulliani pisassiiffiusumit pisassiiffiusumulluunniit nuussisinnaavoq (pisassiissutit nuunneqarsinnaasut)."

## § 39-mut

6. § 39, imm. 1 ima oqaasertalerneqassaaq:

"Aalisarnermik ingerlatsisoq ingerlatsisumut allamut ukiumut pisassiissutit 10 %-ii tikillugit nuussisinnaavoq (ukiumut pisassiissutinik tuniniaaneq)."

7. § 39, imm. 4 imatut oqaasertalerneqassaaq:

" Imm. 4. Teknikikkut, aningaasaqarnikkut, niuernermit tunngasutigut imaluunniit allanik immikkut pissuteqartumik ukiumi pineqartumi ukiumut pisassiissutit minnerpaamik 75 %-iisa aalisarnissaannut periarfissaqangvissortoq ingerlatsisup uppersarsinnaappagu ukiumut pisassiissutit 10 % qaangerlugu tunniussinissamut Naalackersuisut akuersillutik nalunaaruteqassapput."

#### § 76-imut

8. § 76, imm. 1 ima oqaasertalerneqassaaq:

" § 76. Inatsisartut inatsisaat 1. januar 2025 atuutilissaaq, taamaattorli § 24, imm. 2-mi pisanik 30 %-inik tulaassisussaataaneq 1. januar 2030 atuutilissalluni."

Allannguutissatut siunnersuummut nassuiaatit

#### **Nassuiaatit nalinginnaasut**

Inatsisartut 2024-mi upernaakkut ataatsimiinneranni Aalisarneq pillugu Inatsisartut inatsisissaatut siunnersuut 11. april 2024-mi siullermeerneqarluni suliarineqarpoq. Siunnersuut Aalisarnermut, Piniarnermut Nunalerinermullu ataatsimiititaliami suliassangorlugu innersuunneqarpoq. Ullormi 8. maj 2024-mi Aalisarneq pillugu Inatsisartut inatsisissaatut siunnersuutip aappassaaneernejarnissaanut ataatsimiititaliap isumaliutissiissutaa Naalackersuisunit tiguneqarpoq.

Ataatsimiititaliap isumaliutissiissutaani inassutigineqarpoq, ataatsimiititaliap oqaaseqaatai malillugit Naalackersuisut allannguutissatut siunnersuummik saqqummiussissasut. Allannguutissatut siunnersuuteqarnikkut Aalisarnermut inatsisissamut siunnersuummi allannguutit arlallit siunnersuutigineqarput, tassunga ilaallutik: § 24, nunatta Kitaani raajarniarnermi tulaassinissamut pisussaaffimmik aalajangersaasoq aammalu § 35, akuersissutinik pigisalinnut atuinissamut pisussaaffimmik aalajangersaasoq.

Allannguutit taakku arlallit siunnersuummut tamarmiusumut aningaasaqarnikkut kinguneqarput. Kingunissat pineqartut ataani sammineqassapput. Maluginiarneqassaaq naatsorsuinermit inatsisissatut siunnersuut ataatsimut isigalugu nalilersuisoqarmat, pineqartut ataatsimut isigalugit sunniuteqartarneri kiisalu pisassat amerlanerpaaffilerneqarnissaat ilanngullugit.

**Kitaani raajarniarnermi pisat 30 %-iinig nunamut tulaassisussaataaneq**

Kitaani tamarmi raajarniarnermi pisat 30%-iinik nunamut tulaassisussaataaneq eqqunneqassappat ullumikkumut inissisimanermut sanilliullugu angallatit tunisassiortut tunisassiunngitsullu akornanni assigiinngitsunik sunniuteqassaaq, sunniutissaali tamarmiusut ajunngitsuusussatut naatsorsuutigineqarluni.

*Siunissaq qanittoq isigalugu* raajarniarnermi pisat 30%-iinik tulaassisussaataaneq ullumikkumut sanilliullugu isertitanut, pisortat isertitaanut suliffissaqartitsiniarnermullu sunniuteqassanngilaq.

*Siunissaq ungasinnerusoq isigalugu* raajarniarnermi pisat 30%-iinik tulaassisussaataaneq isertitat ilanngaaseereerluni ullumikkumut sanilliullugu 0 - 156 mio. kr.-inik amerleriarnernik kinguneqassanganneqarpoq, apeqquataalluni ullumikkut sinerissap qanittuani raajarniat qassit kilisaatinik nammineq tunisassiorsinnaasunik pisaarniarnersut. Ilutigisaanik siunissaq ungasinnerusoq isigalugu pisortat isertittagaat ilanngaaseereerluni 0 - 186 mio.kr. missaanik amerlissanganneqarput. Kiisalu allannguutit raajanik suliffissuarni sulisartut ukiumut 0 - 108 ikileriarnernik kinguneqarsinnaavoq.

**Nunat allamiut piginnittuusinnaanerinit tunngatillugu immikkut akuersissuteqarsinnaanerup peerneqarnissaa**

Nunanit allanit aningaasaliissuteqarnissap peernissaanut periarfissaq siunnersuummi allassimareermat, immikkut akuersinissamut periarfissap peerneqarneratigut aalisartut ullormit aalajangersimasumit Kalaallit Nunaata avataani najugaqartunik piginnittoqalersinnaajunnaarneranik kinguneqaannarnissaa naatsorsuutigineqarpoq. Nunanit allanit piginnittoqarsinnaaneq qanoq sivistigisumik atassanersoq pillugu nalornineq immikkut akuersinissamut periarfissap peerneqarneratigut annikillissaaq. Siunnersuummi nassuiarneqarsimaneratut manna aalisakkanik ikerinnarsiortunik aalisarnermuunerusoq sunniuteqassanganneqarpoq.

**Siunnersuummi aalajangersakkanut ataasiakkaanut nassuiaatit****Nr. 1-imut**

Aalisarnermut, Piniarnermut Nunalerinermullu Ataatsimiititaliap inassutaa tunngavigalugu aalajangerneqarpoq, § 9 imm. 1-3 naapertorlugit immikkut akuersissuteqarsinnaanermut atatillugu "kalaallit inuussutissarsiutigalugu ingerlataqartut aamma Kalaallit Nunaanni suliffissuaqarnermik ingerlataqartut" nalinginnaasumik mianerineqassanngitsut, tassa aalisarnermut inatsisissamut missingiummi siullermi taamatut siunnersuuteqartoqarmat.

## Nr. 2-mut

Inatsimmi § 24 imm. 2 naapertorlugu Kalaallit Nunaata Kitaani raajarniarnermi tulaassinissamut pisussaaffik 30 %-imut aalajangersarneqarpoq. Inatsimmi maannamut atuussimasumi tulaassinissamut annertussusiliisoqarsimanngilaq, taamatullu aalajangiineq Naalackersuisunit aalajangersarneqarsinnaalluni. Periuseq naapertorlugu maannamut angallatit avataasiortut 25 %-imik tulaassisussaataitanikuupput, allannguutissatullu siunnersuuteqarnikkut tamanna 30 %-inngorlugu annertusineqassaaq. Maannamut sinerissap qanittuani angallatit aallaaviatigut 100 %-imik nunami tunisassiorfinnut tulaassisussaataitanikuupput. Maannakkut angallatiminni 70 %-imik tunisassiorsinnaanngorput.

## Nr. 3-mut

Allannguut inatsisilerinermi teknikikkut misissoreerneratigut naqqiutaavoq. § 28, imm. 1, nr. 4-mut innersuussisoqarani § 28, imm. 1, nr. 5-imut innersuussisoqarpoq.

## Nr. 4-imut

Allannguutissatut siunnersuutip kingunerissavaa, ingerlataqartup aalisarsinnaanermut pisinnaatitsissutini atortassagaa, ukiumullu pisassiissutimit minnerpaamik pisassiissutip 75 %-ii aalisarneqartassasut aalajangersarneqarluni.

## Nr. 5-imut

Allannguutissatut siunnersuuteqarnikkut ingerlataqartup pisassiissutiminik atuinissamut pisussaaffia 85 %-init 75 %-inut appartinneqarpoq. Tamanna immikkoortoq 7-imi ukiumut pisassiissutinik tuniniaanermut oqaaseqaatinut sanilliunneqassaaq.

## Nr. 6-imut

§ 35-mi atuinissamut piumasaaqatip 75 %-imut appartinneqarnerata kingunerisaanik ukiumut pisassiissutinik tuniniaanermut periarfissaq 8 %-imiit 10 %-imut annertusineqarpoq. Periarfissaq taanna atorneqassappat tunineqartut nuunneqarsinnaasunit ilanngaatigineqassapput.

## Nr. 7-mut

Allannguutissatut siunnersuutip kingunerisaanik, tak. allannguutissatut siunnersuummi immikkoortoq 7, ingerlatsisup ukiumut pisassiissutiminik 10 %-it tikillugit tunisisinnaavoq.

## Nr. 8-mut

Immikkoortoq 2-mi allannguutip kingunerisaanik maanna kilisaatit raajarniutit avataasiortut 75 %-it tikillugit tunisassiorsinnaanerat 70 %-it tikillugit tunisassiorsinnaangorlugit nikisinneqarput. Umiarsuaatileqatigiiffiit allannguutimut naleqqussarsinnaaniassammata allannguutissatut siunnersuut naapertorlugu aalajangersagaq 1. januar 2030-mit aatsaat atuutilissaaq.